

欽
定
全
唐
文

欽定全唐文卷一百九十三目錄

楊炯
四

唐同州長史宇文公神道碑

唐恒州刺史建昌公王公神道碑

瀘州都督王湛神道碑

後周青州刺史齊貞公宇文公神道碑

欽定全唐文卷一百九十三

楊炯四

唐同州長史宇文公神道碑

諸侯計功其銘曰仲山甫式於百辟大夫稱伐其銘曰正
考甫恭於三命所以揚其先祖所以示其子孫上古之初
刊於禮樂之言中年以降述於宗廟之碑文質旣殊條流
遂廣山河永配金石長存或旌原氏之阡或表滕公之墓
觀百林之字者孝廉之舊業於是乎不愆不忘讀黃鳥之
詞者文範之餘風於是乎可久可大公諱珽字叔珉河南

洛陽人也宇文歸之遠派宇文翰之餘秩龍火晝夜於鍾
山鵬雲南北於溟海自中州圯圻上國崩離魏氏忘其寶
圖齊人弄其神器則天有成命周雖舊邦文王以業重三
分昭事上帝武王以功成八百陰隲下人車書混一於域
中子弟星羅於海內方乎劉澤乃天漢之懿親匹以曹洪
卽當塗之近屬及其隋室遷鼎唐運握符固亦壇社仍存
山河不替曾祖顯和後魏冠軍將軍朱衣直閣東夏州刺
史車騎將軍散騎常侍長廣郡公周贈使持節開府儀同
三司延丹綏三州諸軍事延州刺史周書有傳對揚天命

保乂王家霍去病初封冠軍周亞夫始爲車騎剖符之重
任在於六條建國之榮禮高於五等祖神舉使持節驃騎
將軍開府儀同三司京兆尹柱國大將軍并潞肆石四州
十二鎮諸軍并州總管東平郡公贈少保周書有傳材優
輔弼業贊雲雷晉則羊祜儀同楚則若敖柱國王章之拜
京兆天子聞其直言郭伋之莅并州諸童符其恩信考誼
隋文皇帝挽郎皇朝益州青城瀘州清苑二縣令鈞深致
遠直道正詞不汲汲於富貴每乾乾於日夕廣都蔣公爰
非無社稷之能太邱陳仲弓自有閨門之德公慶成弧矢

氣襲芝蘭劒則赤山之精照牽牛於北列鼎則黃雲之寶
入天駟於東方資大孝而立身蘊中和以成德詞參變化
稽百代之闕文學富圖書閱三冬之舊史司徒袁粲許之
以枯栢豫章處士襴衡目之以椅桐梓漆初任國子生擢
第授道王府參軍兼鄭州參軍事橫經太學射策王庭高
陽才子宣慈惠和之譽武公新邑濟河洛潁之間兼攝務
殷參卿位重王微之任達國士升車劉簡之博聞中郎寓
直秩滿授遂州司戶參軍事天開井絡地洩江源財雄翕
習於外區棟宇相望於近甸尹興爲政知陸續於衆人黃

讜臨官識包咸於數子尋遷絳州翼城今大梁星野少澤
封圻城故絳以深其宮都新田以流其惡實惟繁劇載著
循良魯國有司無擅徵之事南陽郡吏罷休沐之娛州府
狀聞鄉亭頌德亦由禮讓之化縣竹於是乎作歌風俗之
夷浚儀於是乎刊石稍遷符璽郎尋奉勅檢校鴻臚本官
如故環濟要略掌天子之符璽劉熙釋名表京師之心腹
是分麾節式贊王侯國信不差郊迎有序遷尚書職方員
外郎夏書禹貢辨其川澤周禮職方明其物土清晨伏奏
幾承題柱之恩閒夜絜齋惟有張燈之宿詔除朝散大夫

晉州司馬尋遷長史平陽舊縣姑射靈山玉印仍存瑤城
未改習鑿齒之逢宣武三命而踐侍中管公明之謁冀州
四見而登別駕詔遷同州長史河西輻輳渭北膏腴秦地
之下邦漢京之左輔使君何以爲政端右宜其得人江統
知賢直言則陳留阮宣子唐林薦善通理則汝南黃叔度
王祥糾合屈公輔之宏才荀羨逸羣壯沖天之勁翮享年
六十有五以永淳元年六月二十一日終於華州之別業
嗚呼哀哉公元亨利貞文行忠信禮樂之君子儒林之丈
人當在顏冉中求自是風塵外物友于之義伯淮與季江

同寢朋從之道鮑叔與管仲推財優游大學之中藉甚平
臺之下輜車就列化洽於二州油軾當官政成於半刺道
尊德貴而大位不躋有志無時而天年不永卽以其年十
月遷窆於鄭縣安樂鄉之西源嗣子某官等詩禮預聞箕
裘早學生則盡其養劉殷積粟於七年歿則致其哀唐頌
絕漿於九日占白鶴相青烏鄭伯所封有咸林之采地晉
侯所賂有河外之城邑其川渭水而玉璜其鎮華山而金
石習習旃旒紛紛野田范巨卿則素車來哭韓元良則總
麻設位大夫受梁鴻之命終陪烈士之墳妻子從田豫之

言竟托神人之墓嗚呼哀哉銘曰

國自東部家承北平遂荒中縣奄有神京時逢日薄運改

天正二王之後三代之英

其一

惟宗惟祖有典有則大魏將

軍隆周柱國於穆顯考其儀不忒禮樂宣風閨門表德

其二

五才鍾秀百福與賢蜀都曾子漢代顏淵公之廣學其積

如山公之大辯其流如川

其三

親則邴霍地居周鄭人物會

同歌謠鼎盛設官分職天子有命束髮登朝參卿軍政

其四

江漢之流河汾之都禮優懸榻任重前樞六璽爲貴皇天

降符九州爲廣益地開圖

其五

平陽守土下部風俗秦晉間

閭山河軌躅緹油之化海沂之曲始聽雞晨行復驥足

其六

龜長筮短吉往凶來賓朋永訣徒御相哀華館無象元堂

不開青龍水曲白馬車迴

其七

漠漠古墓槭槭寒桐郭門之

路平林之東天光少日地氣多風凡生物而必死唯君令

始而善終

其八

唐恒州刺史建昌公王公神道碑

王氏之先代爲佐命秦之霸也則王離滅楚國而三將連
衡漢之興也則王陵誅項籍而五侯同拜南陽克定應圖
識而作司空西晉聿興合詞謠而濟天下昔者伊尹伊陟

但保乂於商朝太公桓公唯夾輔於周室蕭何之後居食
祿而無聞鄧禹之孫在當塗而不嗣未有夏殷三統金木
五遷冊命重光軒裳代襲則我瑯琊之郡有冠蓋之里乎
建昌之縣有公侯之子乎公諱義童字元稚其先瑯琊臨
沂人也永嘉之末徙於江外皇運之始遷於五陵今爲雍
州萬年人也祖僧興齊會稽令梁安郡守南安縣開國侯
祿位千石珪符五等營室迴於羽儀山河入於盟誓父方
駱梁正閤主簿伏波將軍梁安郡守隋上儀同三司以惠
和之性有文武之才伏波將軍從征等於馬援儀同三司

開府均於鄧隲家餘積慶郡不乏賢代臨本州則元賓之
父喜形於色繼爲本守則張翕之子迎者如雲自齊國遜
位於梁庭及隋人內禪於皇室夏禹之鼎寶命集於周朝
御龍之家世祿歸於范氏公台階茂緒昴宿精靈五百歲
之賢才一千年之王佐忠規武節學府詞林元方閨門敬
其有德少游鄉里稱其善人實惟清廟之器是曰皇家之
寶韻諧金石奏虞庭之八音德合珪璋列塗山之萬國黃
河一曲之水莫測其源赤城千丈之巖未階其峻羣童忽
聚綴帛而引旛旗父老相呼授履而傳兵法隋授左勳衛

率非其好也河東離析海內風塵天子溺於膠船諸侯問
於金鼎能扶天下之危者必據天下之安能除天下之憂
者必享天下之樂我高祖神堯皇帝就之如日望之如雲
發三河之雷電平四海之厯象武王之仗黃鉞一月臨於
孟津高帝之執朱旗五星聚於東井公瞻烏於屋射隼於
墉陳平則間行而去楚酈生則長揖而歸漢奉符繫組觀
軹道之降王偃武修文見山陽之散馬初拜車騎將軍稍
遷右屯衛將軍錄有功也考於周典崇德報功稽於春秋
策勲命爵車騎萬隊備涼土之羌戎衛軍千兵掌京師之

屯禁於時天下初定邊方未輯二十八舍尚有吳越之妖
氛一十三州猶積東南之殺氣武德四年詔公爲江南道
招慰使鼓琴而送受命而行乘使者之輜車掌行人之旌
節陸賈至於南海先責尉佗隋河入於九江卽徵黥布詔
除泉州都督封建昌縣男食邑三百戶斗牛星象舜禹精
靈境接東甌地鄰南越言其寶利則璫瑁珠璣敘其風俗
則丹雞白犬公門容駟馬位列三刀防薏苡之譏嫌絕簡
書之流謫豈直廣州清節約貪泉於石門合浦神君返明
珠於漲海貞觀三年詔遷散騎常侍行果州刺史授期天

帝肇跡人皇南充國之舊都西宕渠之古邑岡巒紛糾天彭雙闢而作門珠貝浮沈巴水三迴而成字公入參師友出居方伯金蟬左貂朱旗曲蓋纔臨蜀郡卽聞來暮之謠初踐益州已聽中和之樂七年詔遷銀青光祿大夫行恒州刺史西街畢昴北岳恒山天開太乙之宮地列并州之鎮境分靈壽魏將樂羊之所封邑對行唐趙王惠文之所築公政成朞月風行萬里鄧晨一郡漢帝稱爲主人李廣數年匈奴號爲飛將行嘗計日郭伋不負於童兒郡異中平王觀無私於任子旣導德而齊禮亦勝殘而去殺三禾

在殿將拜鄭宏兩鴈隨車坐悲虞國享年若干以十五年
冬十一月二十五日薨於洛陽之清化里公家傳將相世
有忠貞屬離亂之宏多值風雷之草昧河宗兩日負鼎而
謁成湯渭水七年垂釣而逢西伯將軍再命刺史三遷种
鬲樂巴牧人之良翰龐參虞詡將帥之宏規立事於當年
揚名於後代兄國印穀州刺史弟國稀仁州刺史荆枝擢
秀棣萼生輝何止平輿之二龍是爲賈家之三虎唐虞之
際四岳分居趙魏之間八男爲郡公雖勲參締構位總班
條金友玉昆良田廣宅而能吐食下士倒屣迎賓無笑客

之美人有拜賓之童隸策名委贄善始令終生當封侯克
成丈夫之志死而可作無忘事君之道越十六年二月二
日葬於伊闕縣之萬安山詔贈雜物百段給議仗往還禮
也亭連長樂城枕高都守闕塞者汝寬適伊川者辛有北
瞻洛汭尚想元凱之墳東望邢山依然國僑之墓夫人陽
翟縣君河南褚氏卽太常卿陽翟康侯亮之女中書令河
南郡公遂良之妹也宋公子之流派褚先生之苗裔宏夫
人之禮傳淑女之詩有文在手歸於魯國有鳳和鳴適於
陳氏邑之石窰縣以封邱夫尊於朝妻貴於室仙人暫別

初悲寡鶴之聲寶劍纔分終合雙龍之氣以某年月日薨於某所越某年月日祔於建昌公之舊兆長子師本太穆神皇后挽郎襲建昌公歷韓王府祭酒岐州司士參軍定州安喜縣令譽聞州里學富邱山以卿子而爲郎以象賢而開國朝遊楚澤暮宿燕宮東臨石柱雍爲積高之地右會長星唐是中山之邑出遊鄰國不以陪臣見輕上謁邦君不以屬官相待洛陽朝覲適見雙鳧東都墓田行悲駟馬以年月日終於某所越某年月日卽陪葬於先兆次子師表左千牛備身遷尚輦直長歷許州臨潁博州堂邑滄

州樂陵縣州萬安果州西充五縣令能傳祖業克嗣家聲
有言偃之文章兼仲由之政事晨陪紫極繞鈎陳之六星
旦奉黃麾屯玉車之千乘至若繁昌土宇魏文帝之墀壇
堂邑提封漢陳嬰之侯國河分九道渤海東臨江派五津
崑崙北指莫不愛人以禮爲政以德鍾離意之禁暴不用
尺刀公孫述之有神能持五縣次子師元雋州都督府嘉
徵縣丞次子師楚夔州都督府雲安縣令芝蘭有秀羔鴈
成行滇北數十尹莫大邛都之縣邑東七百里唯有巫山
之峽言其縣職夔龍入於闕門敘其邑人鸞鳥翔於學舍

咸能生盡其孝喪盡其哀積粟萬鍾思負米而何得椽題
三尺泣吾親而不見卜其宅兆麟鳳匝其岡巒陳其簠簋
春秋變其霜露思傳舊德式建豐碑戴安道作頌於鄭元
蔡伯喈披文於郭泰魏武皇讀而稱妙非所望焉夏侯湛
見而陋之固其宜也銘曰

厥初兮后稷導生人兮知稼穡降及兮文王精翼日兮衣
青光平東遷兮郊鄆晉上賓兮帝鄉秦三將兮繼代漢五
侯兮克昌比狼山兮峻極等淮水兮靈長惟祖考兮鼎盛
佩金璋兮疊映彼山川兮降靈生玉樹兮青青成張良兮

昂宿乘傳說兮箕星出忠兮入孝武緯兮文經陳嘉謨兮
制千里搞藻思兮挾天庭有隋兮喪亂土崩兮瓦散皇運
兮權輿人神兮攸贊值笙鏞兮變響屬天地兮貞觀河兩
日兮事殷井五星兮歸漢帶長劒兮曄煜擁幡旌兮照爛
周命兮惟新雲雷兮尚屯控東南兮荒景負江海兮未賓
陳禮樂兮命使動輜車兮麟麟用蛇符兮澤國頒虎節兮
山人專一方兮革面重九譯兮稱臣天垂兮星紀地連兮
交趾山草樹兮潛移蜃樓臺兮鬱起遷合浦兮太守爲廣
州兮刺史歸漲海兮明珠飲石門兮貪水侃沖天兮八翼

代出身兮萬里全蜀兮奧區枕印笮兮倚巴渝有靈臺兮
古跡有充國兮舊都豐貂兮左珥介士兮前驅濬三刀兮
持節昌兩日兮剖符降鳴鳩兮大夏騁神馬兮長衢畢昴
兮分野蘭堂兮四下漢皇帝兮國都耿將軍兮壇社若恒
山兮詔鄧猶朔方兮命賈李北平兮漢飛郭并州兮竹馬
瞻泰階兮坐躡惜天年兮不假伊大姓兮潁川有美人兮
嬋媛桂生兮因地女嫁兮因天見乘龍兮奕奕覩飛鳳兮
翩翩知遽瑗兮有禮笑虞邱兮未賢始銜悲兮晝哭終共
盡兮千年卜龜謀兮習吉陳旨酒兮嘉粟車徒儼兮在門

旌旆紛兮竟術循洛橋兮南渡從國門兮右出樹蕭蕭兮
有風雲慘慘兮無日指邱陵兮一閉與天地兮相畢悲孝
子兮純深孰憂思兮可任訴高天兮泣血躋厚地兮崩心
樹碑兮神道無媿兮詞林厯陽之都兮水沒圓嶠之海兮
山沈俾外孫兮幼婦生白玉兮黃金

瀘川都督王湛神道碑

惟漢高祖應天順人祭蚩尤於沛庭斬大蛇於豐澤則豐
沛之豪傑乘於雲矣惟漢光武龍飛鳳翔舉新市之八千
破王尋之百萬則南陽之佐命動於天矣我高祖神堯皇

帝以唐侯而建國從晉陽以起兵協和萬邦光宅天下則
太原之衣冠有大勲矣公諱湛字懷元太原晉陽人也十
一代祖卓晉給事中母常山公主河東有湯沐邑因家焉
葬於長壽縣故鄉有太原之號皇業伊始公以中涓從事
賜田鄠杜間今爲雍州人也昔武王定於下人太子賓於
上帝基豐鎬而開國籍神仙以命氏霸則司徒所讓位天
子所不臣昶則孝弟於閨門務學於師友豈直橫江斬將
南登建業之臺玉食金溝北徙邛山之宅自茲厥後數百
年間國移三統周人共推其代祿家徙五陵漢朝不易其

冠冕曾祖邁後魏中書侍郎彭城王府司馬周春官大夫
都督晉陽侯祖亮本州主簿司水上士隋贈信州刺史太
名革於東魏天命集於西周宗伯所以辨其儀林衡所以
平其守父綽秦孝王府掾仁壽宮監離石郡通守晉陽侯
皇朝石州刺史逆賊劉武周攻陷郡城因而遇害贈代州
總管諡曰烈侯禮也天造草昧王業艱難周師纔至於太
原胡兵遂入於離石負戶而汲不能定西戎之禍析骸而
爨不能解南楚之圍仁者殺身以成名君子有死而無貳
公承聖賢之末代屬喪亂之宏多天子乘輿方靖秣陵之

氣諸侯斧鉞莫救驪山之烽國有命而何言邦無道而斯
隱大業之季本州察孝廉非其好也高祖乃操斗極拜圖
書再駕臨於孟津五星合於東井公解衣而濟策杖而行
酈食其之長者逢漢祖而長揖袁曜卿之茂才見曹公而
不拜從平霍邑授紫金光祿大夫入長安加左光祿大夫
歷丞相相國二府典籤參軍事高祖受禪擢爲通事舍人
通直散騎侍郎封金水縣侯食邑七百戶稍遷虞部郎中
丁烈侯艱去職尋起爲隴西別駕商鄜二州刺史上柱國
荊州大都督府司馬冀州刺史定其封邑誓以河山蕭相

立功於萬代留侯決策於千里願持一郡洛陽之任耿純
兼攝八州江都之拜陶侃龍朔三年遷使持節東督瀘榮
溱珍四州諸軍事瀘州刺史江陽縣地瀘水提封參伐下
而爲益州岐山上而爲井絡尺兵再戢黃昌兩日之歌槃
水斯來景伯三年之化功成露冕歲及懸車歎疏廣之知
足慕祁奚之請老乾封二年上書乞骸骨詔公祿賜同京
官仍朝朔望天子厯吉日協靈辰郊上元祀清廟詔公行
太尉事國之大事攝在有司蒼璧黃琮六玉以昭天地路
鼓陰竹九變而祠祖考名遂身退居常待終山川則羣望

並走星象則中台夜圻春秋九十有三以咸亨三年七月
十七日薨於京師永崇里諡曰敏喪事官給賜物三百段
米粟三百石葬日車服往還有司監護公幼鍾偏罰毀瘠
過人八歲讀詩至無母何恃廢書慟哭嘔血數升逮事繼
親孝聞州黨恩深母子比王元之事親夢感夫妻等衡卿
之至孝年纔一紀有若成人吏部薛公見而稱歎潁川之
司馬德操早知劉廙譙國之夏侯泰初深歎樂毅兵次霍
邑力戰有功高祖嘉之賜良馬一匹進圍京城爲伏弩所
中高祖臨視賜物三百段流血及屨未絕鼓音左輪朱殷

豈敢言病武德之始奉使嶺南馮盎等稽首稱臣獻琛奉
贄舍人薛卓遇害北庭詔公責問單于謝罪賜黃金五十
斤雜綵二百段南踰漲海北渡陰山大中大夫去尉佗之
黃屋高車使者作匈奴之鐵券離石之難也枕干而寢見
星而行號泣不絕聲者千里水漿不入口者數日同武陵
之任襲入構諸羌異河內之張武空持遺劍吳遠由其得
銘王裒以之攀栢冀州境內舊多淫祀褰帷按部申明法
禁詔書遷秩百姓攀車立廟生祠樹碑頌德亦猶樂巴典
郡山鬼潛移張禹牧州江濤不起公出身六十載遺愛二

十州遂罷方岳之官仍居上台之位始於撥亂伊尹之輔
成湯終於太平軒轅之得風后然後拂衣高蹈躬覽載籍
著遺誠十八章盛行於代法文王周易之變象尼父孝經
之篇窮性命之理盡天人之際莊周著論生也若浮史佚
立言歿而不朽越文明元年二月十七日陪葬於獻陵禮
也長子朝散大夫行扶風令遐觀等生芻一東泣血三年
不踰聖人之禮能行大夫之孝京兆載開其新阡昆吾用
昭其舊德百年宮室宛在章臺之東五校軍營依然茂陵
之下其銘曰

昔在湯武阿衡尚父下及高光蕭何鄧禹皇天眷命赫矣
高祖惟岳降神克生元輔攻城野戰張飛關羽奇策密謀
荀彧賈詡始陪營衛仍參幕府旌節龍沙軒旗象浦出臨
方岳入調風雨其生也榮池臺鐘鼓其死也哀陳兵復土
孝乎惟孝無父何怙刊石勒銘永傳終古

後周青州刺史齊貞公宇文公神道碑

惟黃帝大電之精以太清而張樂惟高辛招搖之象以人
事而紀官於是乎生我司徒敬敷五教翼贊虞帝而咸熙
庶績惟殷湯受天明命以統九有之師惟微子崇德象賢

以爲萬邦之式於是乎生我丞相約法三章光輔漢室而
威加四海自齊宣皇帝商周之日號西伯以稱臣太祖高
皇帝堯舜之朝避南河而革故司空臨川獻王懿親明德
論道經邦中庶子平樂侯開國承家丹書白馬於是乎生
我齊貞公惟魏之寶惟周之翰開上帝而格天地燮陰陽
而平水土詳求典載厯選台衡或大澤而康帝圖或高邱
而濟王業諸侯五百伊尹出於庖廚甲士三千太公起於
屠釣未有上從軒后下及全齊聖主明君三居域中之大
帝師王佐累極人臣之重古所謂歿而不朽者抑斯之謂

歟公諱彪字明俊蘭陵人也卽宣帝之元孫高帝之曾孫
臨川王之孫平樂侯之子稟神河岳藉慶王侯攀兩曜之
末光乘五行之秀氣溫厚廉讓當時以爲達人宣慈惠和
天下謂之才子屬三方鼎立九土星分祿去公朝失諸侯
之盟會政由梁國建天子之旌旗士女同歎於商墟鬼神
共謀於曹社公杜門屏跡心不自安與門生故吏數百人
歸於後魏宣武皇帝以客禮待之詔除給事中假龍驤將
軍正光五年兼彭城府長史假節則將軍比於王濬優禮
則長史兼於杜襲龍驤可畏晉后任之於渡江騏驥不乘

魏氏託之於留府六年除通直郎散騎常侍中書侍郎永
安三年帝北巡遷撫軍將軍銀青光祿大夫散騎常侍散
騎通直起於天興之元中書侍郎始自黃初之代宣威撫
軍之號僕射光祿之名奇才總於文武重任歸於將相徐
方叛逆以公爲行軍長史兼統別部仍加鼓節彭城宋邑
海岳徐州嶧陽孤桐羽畎夏翟昔稱都會今實邊陲魯伯
禽始得專征周穆王遂行天討公手執旗鼓坐謀帷幄以
陶侃部分之明當阮孚戎旅之重有如荀羨獨負逸羣之
才不學江道空有連雞之喻徐州平遷黃門侍郎揚州大

中正黃扉藹藹青瑣沈沈有若張公之萬戶千門博觀圖
籍太湖爲浸會稽爲山有若荀勗之十郡一州詮藻人物
累遷大司農秦稱內史漢曰司農管東吾陳不涸之名耿
壽昌立常平之議時播百穀后稷讓於虞書阜成兆民列
卿拜於周典普泰元年遷車騎將軍加右光祿大夫永熙
二年出爲潁川太守地稱汝潁俗尚申韓有鄭伯之別都
有周公之朝邑教之德化無囚厯於八年任於賢能旁潤
踰於九里於時齊武王居中作相實有遷鼎之謀周太祖
在外持兵深懷事君之道昭公失位由季氏之執權襄王

出居成晉文之霸業三年秋八月武帝幸長安以義兵從
順大統元年授開府儀同三司封靈璧縣開國子邑三百
戶金堤石印清濟濁河爰賜土田以爲藩屏漢之宰相始
開封邑周之列侯實兼卿士二年拜車騎大將軍九年遷
五兵尚書十年遷中書監領驃騎大將軍加開府儀同三
司進爵爲公增邑一千戶天子有詔不入軍門匈奴未滅
不營私第蔡謨兼五兵之署鄧騭比三台之儀掌中書之
綸翰加上公之冕服十六年遷侍中驃騎大將軍以下並
如故昔惟常伯今則侍中切問近對拾遺補闕冕旒無象

先問顧和玉佩不存卽徵王粲廢帝後二年公不賀出爲
使持節華州刺史侍中並如故桃林國邑大荔城隍三秦
六輔之奧區五岳四瀆之襟帶倪寬之爲內史唯事漑田
薛宣之守馮翊但知拱默尋加特進餘如故官品第一朝
廷所敬辟吏如五府之間班列在三公之後唐虞之繼文
德也稷契謨明於兩朝魏晉之順大名也裴王建功於二
代周武成三年進封青州齊郡公邑二千戶賜號東岳先
生詔曰堯有四岳朕惟公一人賜雜綵二千段甲第一區
雍州良田百頃其優禮如此堯命羲仲星鳥嵎夷之官周

賜姜牙穆陵無棣之境三王不襲同盟固於泰山百代相
因舊國傳於負海惟保定四年公薨於長安私第天子罷
朝羣臣赴弔喪用官給嗚呼哀哉五年贈少保使持節揚
光桂三州諸軍事揚州刺史諡曰貞公禮也公少丁外艱
州黨稱其孝齊武皇帝見而歎曰可謂吾家曾閔外祖太
尉公王儉謂其子侍中騫曰成汝宅相者在此孫乎公之
北歸也後魏宣武帝勅曰昔微子去殷項伯歸漢卿又得
之於今公涕泣橫流跪而對曰臣家國不造鼎祚淪亡進
不能匡正退不能死節今復托身有道何敢比德古人帝

益重之及周太祖作相西朝王侯之下皆望塵而拜公與之抗禮太祖尤相敬待屢有諮詢嘗曰國家之子房也公體淳和之至性負廊廟之大才孝通神明忠定社稷馬伏波來遊二帝晏平仲能事百君在魏則賈詡荀攸在周則太顛閎夭惟司徒克慎厥始惟丞相克和厥中惟公載德克成厥終三后同其政道子孫訓其成式輝光助於日月積德廣於宇宙以某年月日葬於少陵原國遷三代年移十紀杜當陽之碑石沈漢水而無聞仲山甫之鼎銘入匱奴而不出曾孫皇朝右金吾將軍同州刺史得照宏才大

節玉振金聲入當天子之右軍出臨帝京之左輔承積善之餘慶襲大宗之不遷願述家風思傳祖德是用勒銘刻石相質披文載於景鐘大夫稱伐之義書於太常諸侯計功之道追題瓦屑鄭康成北海之門重刻碑陰張平子南陽之墓其詞曰

黃帝攝政勤勞耳目居於軒轅戰於涿鹿咸陽黜夏登壇受福表正萬邦纘禹舊服

其一

逮乎微子周之國賓降及蕭

叔宋之懿親高祖丞相王迹是因宣皇御史社稷之臣

其二

太陰所立皇齊誕聖旣創元基仍集大命謀孫翼子重熙

累盛天祿永終南風不競

其惟公載誕克嗣家聲千丈多

節三年一鳴待時而動以族而行才歸晉國璧入秦庭

其四

符堅拜首降天之使陶豫策名勤王之事任隆起草榮高

近侍赫赫禁門雍容貂珥

其五

日暮青瑣夕郎之職法駕畢

陳黃門次直帝王之盛誠在農殖如京如坻我黍我稷

其六

吳王舊國採山鑄錢公爲中正佩以韋絃夏禹遺跡今來

潁川公爲太守示以蒲鞭

其七

齊稱東帝周稱西伯諸侯謀

王天子下席公之忠義如彼松栢

其八

發自新邑歸於陸海

魏德雖衰天命未改功成晉鄭爲而不宰寵茂山河於是

乎在其九亞夫真將去病元勲持兵對揖絕漠行軍尚書武

庫抑有前聞侍中重席曾何足云其十當塗遜位有周經野

二國唐虞兩朝裴賈出守馮翊人無訟者受封於齊實匡

天下其十一晨占赤烏夜辨黃熊曾參易簣期於令終子囊

城郢沒有遺忠明君輟祭羣臣會同其十二黃屋左纛輕車

介士朝發桐鄉暮歸蒿里積善餘慶由來尚矣公侯子孫

必復其始其十三

欽定全唐文卷一百九十四目錄

楊炯五

唐贈荊州刺史成公神道碑

唐上騎都尉高君神道碑

唐昭武校尉曹君神道碑

益州溫江縣令任君神道碑

原州百泉縣令李君神道碑

唐右將軍魏哲神道碑

欽定全唐文卷一百九十四

楊炯五

唐贈荊州刺史成公神道碑

成氏之先有周之後姬文受命三十八王邕伯象賢二十
一代漢之少府國家維城晉之廣楊王室藩屏公諱知禮
其先上谷人也子孫避地徙於某會祖休寧後魏汾州刺
史齊特進左右衛大將軍宇文朝江州刺史隋成陽郡公
諡曰武勳格皇天澤充區域該備寵榮兼包命賜祖少遐
北齊民曹郎中宇文朝地官上士襲成陽公建國之屬以

訓五品以親百姓父綽隋金紫光祿大夫唐深州刺史上
柱國天子大夫金章紫綬天王使者皐蓋朱輪公誕保靈
和受茲介福講之以學合之以和純粹以積其中文明以
宣其外出於口者必是先王之言萌於心者莫非君子之
德戒慎乎其所不覩恐懼乎其所不聞時止時行左宮右
徵在朝濟濟在家雍雍祇服宏業克丕堂構襲成陽公厯
箕州平城洛州邯鄲二縣令武鄉里閭榆社隄封公宰平
城日宣三德悲歌相聚絃服成羣公宰邯鄲雷震百里儀
刑嘉誨範乎人倫令問廣譽塞乎天壤將蹈九列平三階

豈意太和交薄而天道難謹降年不永春秋若干以某年
月日終於某所夫人宜城縣主聖神皇帝之堂姊王姬外
館之長女夫人道峻於閨房名輝於邦國我大周敘洪範
作武成大賚而萬姓悅垂拱而天下理法號惟舊制贈荆
州刺史生則唐堯不用沒則周武追封爲龍爲光有始有
卒立名於後以顯其親反葬於周不忘其本以某年月日
歸葬於某原碣石恒山燕南趙北禮儀光被宗族相臨大
夫弔桓子之喪天子歸惠公之賵遽瑗之葬不害良田孔
邱之塋不生荆棘長子司衛少卿兼檢校魏州刺史大辨

中子左鷹揚將軍大方少子朝議大夫行司漢主簿大琬
等門承四代德盛三賢有終身之憂盡生人之本璽冊褒
贈宜宣無窮景鍾勒銘若古有訓嗚呼哀哉其銘曰

神岳之英大川之精如山之峻如流之清行之斯立言之
斯成登車發耀在邦有聲傳於舊國舊國惟平宰於二縣
二縣惟寧余聞舊說天鑒孔明誰謂靈誕喪落淑貞永錫
不匱克揚其名冊書光寵沒有餘榮系曰列星垂象今炳
天光白露爲霜兮沾人裳彼蒼天兮殲我良列星垂象兮
炳天暉白露爲霜兮沾人衣九原可作兮吾與歸

唐上騎都尉高君神道碑

南方火德陽精赫雷電之威西陸金行秋令毒風霜之氣
達其變聖人所以定天下之文象其宜聖人所以觀天下
之變或衣裳六合舞干戚而掃虔劉或鐘鼓八紘用甲兵
而誅暴亂若夫皇天失紀彗孛飛流后土不綱山河崩竭
蚩尤食石災害於生人項羽拔山憑陵於上國天子聞鼓
輦之響思將帥以龔行將軍屬甲冑之容攬英雄而決勝
則風雲潛感豪傑挺生得七星之武曲破軍受五運之金
多木少四時繁弱射連尹於磬山萬辟太阿殺顏良於官

渡然後達人知足徒興白髮之歌烈士徇名不受黃金之
賞與夫棄其筆墨漢家封萬里之侯稱爾戈矛周王命百
夫之長豈可同年而語哉君諱則字宏規其先渤海人也
後代因官遂家於涇州之安定縣神房阿閣泰山橫日觀
之峰金闕銀臺滄海蔽天虛之岸風土形勝關河表裏三
分六州之大業師尚父贊其經綸一匡九合之元勲齊桓
公拓其疆場高柴至德藉東魯之聲名高鳳沈研盛西京
之學校英才磊落而秀發人物蟬聯而間起三光不墜察
高星於太紫之宮八柱無疆奠高嶽於中黃之域曾祖冲

北齊鷹揚郎將周左屯衛清官府別將成軍夜火教戰秋
風九天揚後一之兵六合擁前三之陣張良入漢行觀滅
楚之徵微子奔周坐見亾殷之兆祖赦周褒郡南和縣長
陶元亮攝官於彭澤道契羲皇陳仲弓厯職於太邱德符
星緯飄風驟雨不入灌壇之鄉暴虎蒼鷹潛出瑕邱之境
考才朝議郎上開府孫子荆之天骨亮拔不羣王夷甫之
道心神鋒太峻議郎清秩懸符處士之星開府崇班上接
台階之位君雄心獨斷猛氣無前用兵書六甲於自然知
射法三篇於性道早圖星象管公明懷察變之心幼識旌

旗陶恭祖有行師之略屬隋人板蕩天下崩離朱陽夾飛
鳥之雲紫極現雄雞之象陳兵爭戰窺玉策於中州姚石
壇塲竊金符於寓縣我高祖黃雲大帝白水真人風雷海
嶽之純精天地陰陽之正氣媧皇受命殺黑龍而定水災
漢祖乘機斬白蛇而開火運君夜觀乾象晝察人情審勞
勩之謨謠嵩山之讖記關中王氣不勞甘德之言沛國
眞星無待殷墟之說賊薛舉豺狼梟獍禱杌窮奇守幽隴
以行災負關河而作孽天王按劍出軍於玉帳之前猛將
分麾受律於金壇之下以義寧二年王師薄伐趙國公長

孫無忌精兵若獸利器如霜問君以帷幄之謀待君以心腹之寄營當月暈因八門之死生陣法天星乘五將之關格陰華蓋歷明堂以我和而制其離以我直而摧其曲敗楚師於柏舉未足權衡執秦俘於崤陵無階等級此實君之功也其年詔授朝散大夫賜物三百段排患而釋滯功成而不居比疏傳而辭榮追留侯以高蹈三靈革故君子於焉待時四海清平謀臣以之歸第自太王基命成康隆玉版之圖高帝受終文武盛金刀之業家給人足天成地平猶勞水旱之餘尚想京坻之積咸亨三年春奉勅於河

陽檢校水運使搜粟都尉河堤使者銅橈鐵舳蒼鷹白鶴
之船竹箭桃花貝闕龍堂之水引紅粟於淮海汎歸舟於
秦晉遂使齊臣獻納先陳不涸之名漢后絲綸卽有常平
之號望千石之氣可以療飢開萬箱之儲自然知禮此又
君之功也其年詔賜上騎都尉嗟夫河流曲直天道盈虛
鬼神莫之要聖賢莫能預高臺下泣孟嘗君之惻愴可知
梁木興謠孔宣父之平生已矣上元三年春三月日終於
樂邑里之私第享年七十六惟君魁梧動俗符彩驚人忠
孝天資溫良日用一門兄弟盡同鍾毓之車千里賓朋時

命嵇康之駕每至白雲生海素月流天未嘗不顧盼山河
抑揚琴酒馮異之大樹對諸將而無言子夏之名山謝時
人以長往四林遊刃八水忘筌能祛有漏之因早得無生
之法雖十年俱盡陸士衡之長歎有徵而千戴猶生蘭相
如之壯心恒在卽以冬十月丁酉葬於安定東南二十里
之平原禮也陶公相宅郭璞占墳面丹鳳而背元龜兆青
烏而徵白馬三百篇之後卜筮何從二千石之榮子孫無
替長男仁敬中男仁楷少男仁護仁昉等或體窮三變潘
陸不足以昇堂或力敵萬夫關張不足以扶轂有元方季

方之長幼傳學詩學禮之門風金友玉昆忠臣孝子窮號
積於心髓創鉅纏於肌骨星辰已變昊天無報德之期霜
露潛移君子有終身之感葬之以禮垂制度於三王思之
以時別蒸嘗於四季然後按韋賢之舊德敘潘岳之家風
戴逵銘北海之文張昶刻西山之石若使鄧將軍之一見
自得嘉名魏太祖之來觀懸知絕唱其詞曰

金闕千仞銀宮百常發揮雷雨震動陰陽山水形勝人神
會昌九州霸業賜履勤王樂只君子邦家之光驚雷氣候
大昴徵祥運屬飛海時逢吸霜中原逐鹿西嶽亾羊漢起

高帝周興太王乃披荆棘卽奉壇塲國步猶阻黎元未康
將軍不拜使者相望陣合星斗兵符玉璜殲夷叛逆刷滌
邊荒化穆三代時清九皇猶思禮節尚試堯湯漕通淮海
水泛舟航蒼鷹鷁軸紫貝龍堂功立身退懸車杖鄉百年
俄頃萬緒悲涼昔時華屋今日元房平天慘慘半月蒼蒼
地謂西郭山言北邙曲池無處松檟成行

唐昭武校尉曹君神道碑

君諱通字某其先沛國譙人也近代因官遂居於瓜州之
長樂縣故今爲縣人焉顓頊高陽之子孫曹叔振鐸之苗

喬山河白馬漢丞相開一代之基譙沛黃龍魏武帝定三分之業承家卹允岳峙星羅居雍州之西境斷匈奴之右臂門容駟馬旌旗玉塞之雄坐列三貂人物金行之秀祖某隱居不仕父顯盪寇將軍河庭寶玉廣都鸞鳳或閭閻之內禮敵於諸侯或枹鼓之間威振於千里功則可大以官族而爲官德亦不孤惟將門而有將君天才卓越雄略縱橫陶謙性好於幡旗王濬志在於長戟東方諫議口誦孫吳諸葛武侯坐吟梁甫屬有隋之末四海分崩皇運之初三光草昧五星同聚田橫猶在於海中九代飛榮隗囂

尚屯於隴右賀拔盛操符誓衆斬木稱兵以被髮左衽之
餘負櫛杙窮奇之號遂欲驅馳我塞北撓亂我河西天子
不憚於廟堂鼓其雷電使者相望於道路申其弔伐武德
元年乃詔侍中楊仁恭出使先之以德義陳之以兵甲七
旬干羽不藉有苗之師萬國侯王坐見防風之戮君深知
逆順獨斷曾懷去危卽安轉禍爲福非如馬援遨遊二帝
之都不學竇融自保三分之重勅授昭武校尉鮮卑醜類
慕容殘孽遷於大棘之城止於小蘭之介雖謂其羣下願
聞禮於上京而拜於將軍遂誇大於諸國貞觀八年詔特

進代國公李靖爲行軍大總管登壇拜將授鉞行師開太
一之三門閉陰符之六甲決勝於俎豆然後折衝萬里信
賢如腹心故能匡正八極君當仁不讓聞義則行從王粲
之戎旅棄班超之筆研係單于之頸有類長沙斬樓蘭之
王更加平樂詔除上騎都尉車師舊國俯枕前庭戊巳遺
墟斜連後壁負天山而板蕩擁蒲海而虔劉聖人之德非
欲窮兵黷武王者之師蓋爲夷凶靖亂十四年詔兵部尚
書侯君集爲行軍大總管軍營玉帳武略珠韜旌旗蔽於
日月金鼓聞於天地安人保大實憑帷幄之謀斬將搴旗

咸藉武夫之力君緬懷高義思報國恩從來六郡之子是
爲萬人之敵梯衝所及披靡堅城矛戟所臨野無橫陣一
舉而清海外再戰而滌河源飲至策勲抑惟恒授詔除上
柱國君備嘗艱阻頻有戰功天子聞之累加徵辟慕田疇
之節羞賣盧龍之塞高魯連之義請從滄海之遊遂乃散
髮鄉亭拂衣邱壑爲趙魏之老在羲皇之年關內諸公深
知郭解洛陽人物高談劇孟家僮有禮皆使拜賓門客多
才咸能市義南宮養老坐聞鳩杖之榮東岳遊魂俄見鶴
書之召以龍朔元年某月某日終於里第嗚呼哀哉夫人

某官之女也沅湘降祉河洛騰休符玉石之堅貞貫風霜
之慘烈鏡飛天上窺祥鳳於銀臺劒動星文秘蛟龍於玉
匣以某年某月日終越某年月日合葬於某原君孝實因
心忠爲令德鮮花匝樹盡兄弟之歡娛好鳥鳴林展交遊
之宴喜太初朗月俯照金鞍叔夜清風來生寶劒故能戰
必勝攻必取西零種族遙憚武臣北漠酋豪見稱飛將雖
死之日猶生之年園令獨慕於相如漢帝長懷於李牧長
子遊擊將軍和政府右果毅都尉上柱國永雄次子朝散
郎行西州柳中縣主簿上騎都尉知君等三餘廣學百戰

雄才就養之方兼申愛敬慎終之道不忘哀戚雖雨崩防
墓無孔子之格言而水齧前和有文王之故事卽以某年
月日改葬於木城之平原長婦某氏卽永雄之妻也某官
之女柔風淑譽習禮聞詩上奉舅姑旁睦娣姒溫家之婦
方歡白玉之臺盧氏之妻空對黃金之椀先以永淳元年
某月日終至是卽陪窆於塋內右翊衛宏軌兵圖日用劒
術天知六郡許其良家三川養其聲利思宏祖德願敘家
風託無愧之銘跋涉載勞於千仞訪他山之石東西向踰
於萬里烟効官昌運負譴明時始以東宮學士出爲梓州

司法傾蓋相逢當仁不讓庶使見曹娥之碣楊修歎其好
詞讀元壽之文高祖稱其佳作其詞曰

大矣丞相天地寅亮烝哉王侯子孫蕃昌條分葉散源濬
流長金城北峙玉關西侯山澤駢羅衣冠輻湊降神生德
興賢誕秀曰萬人英材標國楨髫年學劒壯歲論兵以身
許國東討西征皇家啓聖撥亂反正逆賊遊魂不恭王命
亦旣授首河西大定叢爾湟中車書未同帝赫斯怒攢其
英雄風行電轉谷靜山空二庭遺孽交河路絕天子聞鼙
元戎按節王師無戰海外有截歸我田廬功成不居歲云

秋矣日月其除壽非金石命也何如孝乎兄弟葬之以禮
蓼蓼者莪人生苦多言猶在耳邈若山河

益州溫江縣令任君神道碑

漢丞相之尊官大位乘輪滿於十人齊景公之利用厚生
有馬盈於千駟羽旄冠劔擬金鳴玉疊其前苑囿池臺清
歌妙舞喧其後崇高在於寵祿大欲存於食貨義然後取
橫玉帶以當仁道不虛行坐鹽梅而自得若乃時之不與
數之不通貴賤任於天窮通由於命左太冲之詠史下僚
實英俊之場嵇叔夜之著書賤職爲老莊之地雖復勢力

以高下相懸尊卑以商周不敵孔宣父中都之小宰幽厲多謝於陪臣陳仲弓太邱之一官公卿有慚於縣長是以德成者上道在斯尊陶潛則安枕北窗言偃則鳴弦東武抑揚足以儀四海顧盼足以破三軍代有人焉斯爲盛矣公諱晃樂安博昌人也其後因官遂家蒲州之永樂天子令德軒皇爲誕姓之源諸侯計功薛國在宗盟之後西京執法則有御史大夫東漢循良則有會稽都尉任光鄉里之忠厚任隗朝臣之鯁直益州從事術數知名臨海真人清貞克已況乎東西海岱強齊九合之都表裏山河全晉

三分之國車馬雷駭衣冠鼎盛盟書百代可謂功臣遷徙
邱陵實惟豪族曾祖顯祖熙考憬並策名天爵獨步人師
懷素履之幽貞保黃裳之元吉張家碑碣荊州有七代孝
廉荀氏鄉亭潁川有八人才子君外資剛健內育文明合
千載聖賢之間鍾五行金木之秀王恭濯濯春柳懷風和
嶠森森寒松列景有曾參之孝有史魚之直有子夏之文
有冉求之藝先王德行固名言而在茲大聖溫良亦顛沛
而於是當朝一見許其王佐之才行路相逢加以美人之
贈解褐爲家令寺主簿天王太子之位赫赫前星天地長

男之宮巖巖左闕出身事主元良永固於萬邦東髮登朝
七鬯不驚於百里秩滿授將作監主簿千門萬戶張華窮
壯麗之圖東主西賓班固盡謳謠之致職掌宮觀是名將
作大司馬桓溫之府績用在於元琳大將軍竇憲之曹文
章寄於亭伯累遷右衛長史南京左掖上將陪藩北落師
門天軍列衛東觀漢記梁統有清白之名中興晉書薛兼
有恪勤之譽詔遷朝散大夫行益州溫江縣令華陽西極
漢水東流背面通秦越之鄉左右夾巴涼之城風煙可接
懸車束馬之山雲物潛通織女牽牛之象神仙所宅則有

二十四居途路所經則有五千餘里金城石郭還聞上代之風國富人安時聽中和之樂於是乎龍泉獨斷龜兆旁求品命千名封疆萬戶暫過亭長乘軒之望可知且詣中軍理劇之才有屬旌孝悌勸農桑省徭役恤鰥寡所以一縣稱平所以百城尤最蕭育是杜陵男子不入後曹黃浮非鄉里所知不寬同歲洛陽行馬門士無心齊國池魚權家絕望鄭文公邵陵之縣但稱男子之名師尚父灌壇之鄉唯有神人之哭實謂樞機八座上下三階豈惟縛柱鞭絲操刀製錦巫馬期之任力弊起乘星鍾離意之悅人災

生解土享年五十有九以儀鳳二年六月二十五日卒於
官第夫人姚氏徵士神俊之女也壽邱僊葉媯水靈苗定
姚信之璣衡審姚光之術藝明星燄燄不臨太邱之前暮
雨沈沈不散巫山之曲婦人謂嫁女子有行織紵組紃棗
脩榛栗南斗千齡之匣忽愴沈江北方三代之儀終悲共
穴先以咸亨三年七月二日終於西京翊善里之私第越
儀鳳三年冬十一月一日歸祔於永樂縣厯山之平原卜
虞芮之閒田帶關河之設險居人致祭桐鄉有朱邑之祠
怪石成墳葉縣有王喬之墓君燕趙奇士神仙中人容貌

魁梧衣冠甚偉揚子雲之窮巷好事來遊段干木之間居
通侯展敬自陳力就列居家可移妾本絕於織蒲馬無聞
於食粟原子思之厚秩徧給鄉人孔文舉之中罇延留坐
客加以備觀圖史尤精釋教夢幻泡電知一切之皆空園
林貨財見三陽之已淨遭時屯坎浮生蹇剝佳人不再荀
奉倩之傷神赤子無期潘安仁之慘慟天乎到此命也如
何及其瞑目少城歸魂舊壤平原古樹唯餘孺子之墳春
露秋霜非復皋陶之祀於是鄉鄰作主朋友加麻撰德銘
之於素常披文刻之於翠石魯哀公作仲尼之誄天不慙

遺蔡伯喈爲有道之碑人無媿色其銘曰

軒帝之族漢朝之臣西州智士東海真人豪傑天縱衣冠
日新實生其德必有其鄰道在爲貴知幾則神氣衝南斗
價直西秦大蒙之信太平之仁辨窮非馬學究成麟孝友
爲政觀光利賓重明比德少海爲春宮室之象南斗北辰
甲兵之衛闔闔鉤陳山控金馬江迴玉輪天文井絡地紀
梁岷庭前置水甑内生塵園蠶有績野雉來馴時命屯蹇
生涯苦辛寶釵虛贈玉樹長淪輔德無輔親仁不親百年
天枉一旦歸真雷鳴之下長河之濱旌旃委鬱徒御逡巡

悲風汨起血下霑巾死而可贖人百其身

原州百泉縣令李君神道碑

金城裂地之災玉弩驚天之禍蹴崑崙以西倒蹋泰山而東覆三微厯數盡薰歇以聲沈萬國衣裳咸土崩而瓦散是故殷憂啓聖聖人騰海岳之符草昧興王王者受風雷之祉則有思窮圖讖潛觀赤伏之萌識洞機祥暗察黃星之兆天懸兩日詢去就於河宗地震三川考興亡於柱史危邦不入亂邦不居翦荆棘而叩天門臨壇場而對休命及其元黃再造日月重輪功成而不居名遂而身退南華

吾師也親居賤職東方達人也安乎卑位然後武城絃唱
優游禮樂之中彭澤琴樽散誕羲皇之表雖杜當陽之文
武蘭菊猶存而薛孟嘗之池臺風煙遂歇悲夫死生命也
貴賤時也用之則行舍之則藏出處者君子之恒務左右
者君子之攸宜吾聞其語矣今見其人也君諱楚才衛州
衛縣人也昔繞樞神電軒轅氏之馭百靈貫斗祥星顓頊
氏之臨四海金科作範商邱有帝系之雲玉札披圖幽谷
有貞人之氣由是公侯策命厯千載而彌昌鐘鼎歡娛經
百王而不替豈直將軍列位孫吳暗合之兵協律當官天

地冥符之樂若斯而已矣曾祖裕後魏東宮舍人太子洗
馬使持節徐州諸軍事徐州刺史燉煌郡開國公贈兗豫
二州刺史直城西望高闕東臨非無置驛之歡實有前驅
之寵琅瑯負海八門都督之榮玉漳瀕河百代封侯之貴
大父昌北齊彭城王府中兵參軍事隋濟陰郡守襲封燉
煌公文場筆海炤爛等於星辰辯囿談叢鏗鏘協於風雅
九千里之丹鳳始踐王門七十日之黃龍初階郡職考孝
友隋晉州岳陽縣令顏回稱太平王佐月角殊姿仲由稱
禮義霸臣星衡詭狀唐都晉野有恒山太嶽之風墨綬銅

章有錯節盤根之化若夫于公之宅駟馬爭驅辛氏之門
五龍齊駕英靈不已還當命代之期將相有徵克保承家
之業東郊競日探祕跡於璣衡西蜀談元測靈心於造化
雄才壯思首九奏而和八音廣見洽聞披五車而誦三篋
加以興居禮樂出入孝忠簡於一人備於萬物弓旌疊湊
始命賢良幣帛交馳載徵巖穴從微至著濫觴萌括地之
波積小成高覆簣漸排雲之構隋大業十二年補謁者臺
散從員外郎非其好也屬三千否運百六災年諸侯窺玉
鼎之尊天子厭金陵之氣蚩尤則命風召雨桀黠於中州

共土則折柱傾維崩騰於海縣能扶天下之危者必據天下之安能除天下之憂者必享天下之樂我高祖神堯皇帝所以從人望宅靈心鎮天關迴地軸鼓聲雷駭親張霹靂之威旌羽星懸手握招搖之柄君沖情索隱妙筭知來候東井而考前聞裂西河而尊故事上略中略奏山石之奇謀文韜武韜奉川璜之祕訣義寧二年授車騎將軍累加開府武德五年遷右衛二十四府右車騎將軍仍於邛州鎮守皇階甫闢猶勞尉候之虛天步初夷尚有風塵之警示之以文德陳之以武功所以外戶不扃所以重門罷

析六年轉中山府左列南州舊俗淫其白獸之祠西襲餘
毗背我黃龍之約王師直進陵劒棧以長驅廟略遐宣指
銅邱而決勝七年詔君討襲楓天棗地金門玉帳之營方
卦圓著剡木弦弓之射以此衆戰誰能敵之以此攻城何
城不克雷出而星曜龍騰而鳳飛一鼓而擒四姓三戰而
平百濮大夫耆老非唯二十七人拓土開疆豈直五千餘
里返行飲至舍爵策勲焉禮也其年加上大將軍賞口十
六人并良馬一匹而俄以爭功得罪游俠從軍特降王綸
遐遷騰府通塞有命潘安仁之緒言富貴在天卜子夏之

餘論無階封禪空嘆息於周南絕望夏臺竟棲遲於漢北
太宗文武聖皇帝承聖皇之大寶奉天帝之休期雷雨八
瀛光華四極旌賢赦過維新之命屢覃念功簡勞性舊之
恩累洽貞觀元年授長樂監仍命於北門供奉宜春禁苑
太液神池浸石菌而揚波擢金莖而挹露南經丹徼恒陪
萬乘之遊北繞黃山再奉三驅之禮當是時也穆穆焉皇
皇焉濟濟焉鏘鏘焉一陰一陽而有序自南自北而無外
猶復中宵不寐殷勤多士之林晷景忘疲渙汗非常之辟
十四年應詔四科舉射策登甲第明於國家之大體達於

人事之始終可謂宰相之璞可謂皇居之寶洛陽才子一
承宣室之談魯國儒生行踐中都之邑尋授靈州鳴沙縣
令累遷原州百泉縣令科通紫微印負黃州涼秋九月寒
沙四面平雲匝隴處處而秋陰圓魄低關蒼蒼而夜色君
乘輜演教佩紱臨人德被三城風移五縣抽琴命操還臨
單父之堂繫石飛鳴卽對李泉之學明以御下將水鏡而
通輝清以立身共水壺而合照神行有感方登玉鉉之階
靈化無方獨歎瓊棺之墓春秋七十有一以顯慶元年十
二月八日終於官舍君年十一丁內艱朋友相哀家人不

識昔稱曾閔今日荀何近古以來未之有也隋郡東曹掾
江溢見而歎曰此真可謂保家緯化嗟尚者久之大業末
年皇綱漸紊不掃一室自懷包括之心獨守太元且忘名
利之境於時魏特進房僕射杜相州等並以江海相期煙
霞相許付同心之雅會訖刎頸之良遊或閉戶讀書累月
不出或登山涉水經日忘歸斯賢達之素交蓋千年而一
遇洎塵埋五岳海沒三山辭殷而奉周背楚而歸漢深謀
遠慮卽良平無以加也行軍用兵則韓彭不能尚焉數奇
命蹇遂無望於高門日往月來竟銷聲於下邑情均寵辱

則萬象同歸跡混彭殤則百齡俱盡浮生若寄大漸彌留
遺誨子孫庶幾薄葬等梁鴻之宅兆邈矣他鄉符祭仲之
高居依然新鄭唯仁與達君其有焉存榮歿哀此之謂也
卽以某年月日葬於某原夫人廣平宋氏齊尚書左丞士
順之曾孫隋建安郡司法長文之季女霜淒月瑩菊艷茗
華淑問秀於閨房柔風洽於詩禮琴前鏡裏孤鸞別鶴之
哀竹死城崩杞婦湘妃之怨長子金河府校尉上柱國輔
仁等十輪方駕萬石駢衡窺上帝之兵鈴入先王之冊府
指蒼天而永訴血下霑襟對白日以長號悲來填臆於是

總麻執友素蓋賓朋傳祖德於高陽考豐碑於太學庶使
城隍一變猶知鄧艾之名陵谷三遷尚識鍾繇之字其銘
曰

玉斗之英瑤光之精巡河并洛握紀提衡柱史論道將軍
用兵陸離簪紱奕葉公卿岳牧騰譽弦歌有聲階蘭疊影
巖桂增榮山澤通氣風雲表靈凝脂點漆月角珠庭白玉
無玷黃金滿籬忠爲令德孝實天經朋友千里烟霞百靈
琴尊野尚松竹山情數屬郡海時逢鬪星黃龍電震白騎
雷驚赫矣高祖元亨利貞聖人有作天下文明自此提劍

因茲間行攀鱗北海附翼南溟水火之陣孤虛之營左提
右挈東討西征巨猾斯斬元兇載清功符衛霍知若良平
自滿知損居中忌盈蕭條異縣坎壈浮生降以中旨賓於
上京陳書詣闕對問揚庭山連鴈塞野接龍垓朞月而已
三年有成波瀾不息箭刻無停梁木其壞高臺已傾關雲
斷絕鴈鴈飛鳴頓雙鳬於葉縣跼四馬於滕城

唐右將軍魏哲神道碑

經天緯地之帝求制禮作樂之才撥亂反正之君資拔山
超海之力繼韶夏而崇謚號非無陣戰之風披皇圖而稽

文武或用干戈之道故能彌綸宗廟彈壓山川苞四海以
爲家一六合而光宅是以二十八宿懸列將而察休徵三
十五星聚天軍而赫符彩呂望垂竿於渭涘道峻匡周張
良授策於圯橋功崇佐漢乃有心如鐵石氣若風雲洛讖
書名河圖祕象青絲電燭歷大塊以三休碧羽霜淒倚渾
天而一息岑彭許允征南鎮北之名馮異王昌大樹中軍
之號杜太行而泥函谷猛氣無前戮封豕而斬長鯨雄圖
不測元戎十乘驅衛霍於前軍甲士三千列孫吳於後殿
秋風白露執金鼓而齊六軍泰山黃河折銅符而光百代

建廟堂之策爲社稷之臣孰能與於此乎在我右將軍矣
公諱哲字知人鉅鹿陽曲人也七代祖靖非前秦征北大
將軍鎮北地上郡其後子孫因居於寧州襄陽縣開國承
家之始誕姓名氏之源大名發於本支當塗峻於層構三
辰鬱鬱天街分畢昴之都九野茫茫地險列山河之境丞
相以萬機論道匡大運以震威嚴尚書以八座當官贊金
行而標領袖文昭武穆方駕齊驅公子王孫朱輪華轂大
鵬垂翰馭風伯而指南溟天馬騰姿偶雲師而集東道祖
唐隋天水郡丞河陽都尉瑤林瓊樹擢標格以千尋圓折

方流委波濤而萬頃雄飛有望豈惟京兆之丞陰德不憊
何直丹陽之尉父寶皇朝通議大夫總管府司兵參軍事
東家孔子至德生於上天南國申侯明靈誕於中岳君朝
翊贊道先王之法言公府弼諧對上天之休命若夫聖人
作而萬物覩元首明而庶事康日月粲其光華山川鬱其
雲雨則有英靈間出丹陵諧白獸之祥符瑞庭生黑帝感
蒼龍之傑隋珠一寸魏后揚睂和璧千金秦王動色顏生
殆庶聞於竹馬之年揚子參元發自銅車之歲建情峯而
直上疏筆海以橫流彫牆則百堵皆興峻宇則千門並列

可大可久無怠簡易之途爲子爲臣率由忠孝之境郭林宗之披霧豈敢名言孔文舉之欽風每相推荐若乃五材並用誰能去兵七德兼施止戈爲武出師於九天之上暗合兵書取睽於十日之前懸符射法固以文武之道揄揚滿於域中將相之才籍甚聞於海內貞觀十五年起家補國子博士喬林掃日驚白鳳於詞條壁水澄天駭雕龍於義壑班超慷慨常懷萬里之心季路平生每負三軍之氣十六年勅授左翊衛北門長上祿賜同京官仍令爲飛騎等講禮鄧司徒之舊事馬上讀書祭征虜之前聞營中習

禮宮花如錦還臨拜將之壇槐葉成帷復對閱軍之市自
皇王眷命大帝應期運璇衡而制八方調玉燭而臨四極
元兔白狼之野來奉衣簪蟠桃析木之鄉尚迷聲教太宗
文皇帝操斗極把鈎陳因百姓之心問三韓之罪勝殘去
殺上憑宗廟之威禁暴戢姦下藉熊羆之用公丹心白刃
本自輕生六郡三河由來重氣烏江討逆剖項籍於五侯
鹿野懲奸磔蚩尤於四宰二十年詔除游擊將軍右武侯
信義府右果毅都尉長上如故顯慶二年以內憂解職痛
深吳隱哀極顏丁躋厚地以崩魂訴高天而泣血紫泥垂

渙頻降璽書墨緣臨戎遂從金革三年詔除左衛清官府
左果毅都尉尋圉谷府折衝都尉並長上如故又以應詔
舉對策甲科遷左騎衛郎將於時長榆歷歷烽火猶驚高
柳依依邊風尚急關山夜月遂爲丹徼之秋西北浮雲翻
作穹廬之景四年詔公爲鐵勒道行軍總管陳兵玉塞按
節金微學常山之蛇擬麗譙之鶴鐘鼓嘈囂上聞於天旌
旗繽紛下蟠於地伏尸百萬因瀚海而藏舟闢地數千卽
燕山而築觀武臣雄略氣懾西零神將宏圖威加北狄武
德元年詔遷左驍騎中郎將尋檢校右監門左武衛將軍

本官如故昔者封禪陟云亭之後七十二君圖書出河洛
以還三千餘歲振兵釋旅方崇薦帝之儀道洽功成必致
禋天之禮粵以皇家闡統之五十年今上開基之十七載
登封告禪玉牒金繩建顯號而施尊名揚英聲而騰茂實
華夷輯睦皆承萬歲之恩朝野歡娛咸奉千年之慶乾封
元年詔加明威將軍本官如故大風遺孽叛渙青邱小水
殘魂憑陵碧海率百官於文祖尚興彭蠡之師會萬國於
塗山猶有防風之戮是歲也詔公爲遼東道行軍總管軍
營對日兵氣橫天開玉堂而按部坐金城而勒陣闕鞏之

甲犀兕七重艚艫之舩舳艦千里駕鼉梁於聖海秦皇息
鞭石之威泛鰲釣於仙洲愚叟罷移山之力然後風行電
卷斬將屠城塞丹浦之遙源伐黑林之奧本王孫公子名
霑阜隸之臣深谷大山境入樵漁之囿二年詔加上柱國
仍檢校安東都護導之以德齊之以刑威振六官風揚五
部兵戈載戢無勞尉候之虞桴鼓希聞寧有穿窬之盜仰
太陽而晞湛露方預四朝臨逝水而急寒風俄悲一去齊
孟嘗之下淚高榭曲池魯司寇之悲歌頽山壞木長安杳
杳還符日近之言京兆悠悠竟絕天高之問玉關生入自

判無期繡服晨還竟知何日總章二年三月十六日遘疾
薨於府第春秋五十有四嗚乎哀哉詔贈左監門將軍禮
也唯公被服忠孝周旋禮樂仁者見之謂之仁智者見之
謂之智研幾冊府金縢玉版之書索隱兵鈴元女黃公之
法每建旗推轂三令五申躬擐甲胄親當矢石軍井未建
如臨盜水之源軍竈未炊似對嗟來之食由是南馳北走
東討西征運之無旁按之無下戴筐宮裏遙登大將之壇
飛閣星邊獨列中軍之位雖龍泉匿字薰歇光沈而鱗閣
飛名天長地久夫人扶風馬氏隋濠州刺史圓之孫也五

松春艷牽少女之祥風八桂秋榮降仙娥之寶魄謝家之
子歌柳絮而知慚劉氏之妻頌椒花而自恥三從按禮無
虧內則之風四德揚蕤載闡中閨之訓宿盤龍於月鏡早
沒鸞牀矯飛翼於霞樓先沈鳳穴珠星璧月終陪季子之
階金鼎銀罇竟列齊侯之寢以貞觀十五年五月五日終
於某所越咸亨元年某月日祔於某原長子瓜州司倉擇
木次子右衛親衛元封等門傳萬石庭列雙珠花萼爭榮
芝蘭藹秀天經地義欽承避席之談日就月將虔奉趨庭
之教變槐檀而瀝膽木石悲酸代霜露以崩心幽明感動

葬之以禮祭之以時生人之本盡矣死生之義備矣孝子之事親終矣於是門生故吏共緝家聲才子文人思傳盛德庶使蘭相如之生氣歷千載而猶存隨武子之餘風盡九原而可作其詞曰

文王受命畢公餘慶玉樹連芳金枝疊映三分並列七雄齊競建國承家重熙累盛功宣蹈舞德流歌詠河洛垂文山川出雲驪珠育照虹玉呈文直立孤聳天然不羣棲遲膠塾悅懌邱墳恥爲儒者自許將軍伊祁不懌軒轅討逆陣擁遼河兵屯碣石班超投翰揚雄執戟弓合三材刀長

四尺爰清尉候載澄疆場得人者昌失人者亡皇恩俾乂
帝曰明敷幽桂含馥滋蘭吐芳承天待詔觀國賓王茂績
斯遠英聲克彰鵬池淼漫鷄山禍亂出閭辭家夷兇靜難
金微瓦解玉亭冰泮扈駕天門陪祠日觀萬邦胥悅千齡
啓旦斗骨危城占蹄舉兵丸山霧塞渤海波驚帝赫斯怒
王師有征虔劉北貊戡翦東明導以文軌宣其德刑太微
上將文昌貴相非熊非羆令聞令望寵踰軍幕榮參武帳
本謂來朝何期返葬原野蕭瑟風烟悽愴天道如何吞恨
者多松風夜響薤露晨歌秋月如練春雲似羅榮華滅後

寒暑經過青烏邱壠白馬山河